

64

DEO OPTIMO MAX.  
UNI ET TRINO,

VIRGINI DEI-PARÆ, ET S. LUCE,

Orthodoxorum Medicorum Patrono



QUÆSTIO MEDICA\*

CARDINALITIIS DISPUTATIONIBUS

*manè discutienda in Scholis Medicorum, die Jovis decimâ-tertiâ  
mensis Novembris, anno Domini M. DCC. LXXXIII.*

M. JOANNE THAURAUX, Doctore Medico, Præside.

*An Rheumatismo Sudorifica?*

I.

**A**RTEs esse quasdam quæ laborem & molestiam artificibus, utilitatem & auxilium iis qui utuntur impertiant, in arte medicâ experiri cuique licet: Medicus naturæ minister ut suo perbellè fungatur officio, non tantum in curandis cujuscumque generis morbis insudat multum & invigilat, sed præsertim in iis eorumque causis cognoscendis, quibus incognitis frustra præscribit remedia. Non intellecti, nulla est curatio morbi. Hinc insanabiles plerique morbi, quia incogniti; hinc præmatura moriendi necessitas nullâ reparabilis arte, ob neglectam morborum & causarum cognitionem certam, licet verius causæ prophylaxis quàm medela debeatur. Noli tamen Medicinam floccifacere, quod immortalitatem nesciat, & homines senio confecti, ejus ope non rejuvenescant? præfixus à Deo Optimo Maximo vitæ terminus Medicinæ necessitatem non excludit. Quos absolutè non sanat Medicina, iis tamen est auxilio, dum justam vivendi legem & exquisitam non inutiliter decernit. A lautâ & opiparâ mensâ in simplicem & frugalem victum, mutationem quibusdam in morbis remedium salutare fuisse, quis ibit inficias? quorum verò curationem novit perfectam, non à symptomatum ablatione, (quibus nulla debetur medela,) sed à causæ morbificæ profligatione methodica auspicabitur Medicina; hæc etsi conjecturis nitatur, quæ sua sunt, certâ cum ratione curat, quamvis suum finem semper non assequatur: morbos omnes velle sanari, stultitiæ argumentum est.

II.

**V**ISCERA quæ vitæ fovendæ ac prorogandæ destinata sunt, calore vigent luculente, qui quamdiù modum servat, illa benè constituta habentur, ut caloris moderatione vel excessu, viscerum integritas vitiumque innotescat. At ille sæpius exuperat; hinc multis morbis occasio nascitur, præsertim doloribus Rheumaticis, qui ab uno viscerum fervore, maximè hepatis, emanant: calidâ siquidem intemperie malè moratum nutritium illud viscus pro laudabili quem

\* Propugnata, 4 Februarii 1666, à M. Paulo MARTOT; M. Nicolao RICHARD, Præside.



condere debet sanguine, humorem reponit nimis biliosum, salsum & acrem; quem adulterinam tanquam sobolem sibi que infensissimam respuens, omni nisu à se longè latèque promovet, & in varias partes confestim amandat, in vasa primùm majora, dehinc in minora, tandem in minima, è quibus in habitum corporis per *πυλιν* eruatur: ubi ob substantiæ tenuitatem & vernaculam mobilitatem, horsum vorsumque variè impulsus, fugaces & momentaneos excitat Rheumatismi dolores, quos melancholici succi frigiditas, & innata sanguinis dulcedo nusquam movere valent. Unum ergò præ omnibus serum, aquæ impar, perenni hepatis æstu genitum, uberiore acrioreque sale conspersum, in corpore stagnans, & copiâ luxurians, hos ciere cruciatus aptum natum est, dum à robustis partibus internis, illius ferocientis pruritum ac titillationem ægrè ferentibus, in externas & debiliores amandatur; à quibus improvise motu, modò in hoc, modò in aliud latus evomitur, nullibi locorum desidens; sæpè sine rubore aut tumore, non semper sine febre, licet periculosè, perioestium membranosumque genus acuto dolore crucians atque exercens; hinc perenni bellorum segete naturam oppugnat, nec priùs quiescit quàm novum sibi quæsierit hospitium, hospitii nescium; adeoque non alia dici potest hujus biliosi, ferini ac mordacioris feri Rheumatismum committentis, quàm gratiosi & alibilis humoris scaturigo; ut undè vita, indè oriatur exitium. (\*)

## I I I.

**D**ESULTORIUS Rheumatismi dolor, æstuantis jecinoris dura & crudelis fœtura, ut nulli ætati, nullique sexui, nec iis quibus magna sunt viscera, infelixque ingenium parcit, sic nullis corporis partibus ignoscit; aliquandò tantà ubertate circumfluit humor seditiosus Rheumatismum pariens, ut vix ullum sit membrum vel externum, vel internum, quod oberrantis & lascivientis istius humoris ictus declinare valeat, ita ut non pauciora sint supplicia quàm membra: nec tantum humor iste calore fervidus, corruptione ingratus ab internis irrui in externas, & à supernis, torrentis in morem vel confestim in subditas præceps devolvitur, & roris instar guttatim depluit; sed etiam contrario penitus conatu, relictis corporis pomœriis, penitiora subit, & fractis inferioribus naturæ valvis, supernas impetit partes, absque ullo etiam sanitatis dispendio; quis nescit bonis ægrotantium rebus aliquandò refluerè humorem à partibus infirmis ad robustas? Hinc malè *Catarrhi* nomine donatur Rheumatismus, dolores erraticos externum corporis habitum occupantes, ab efferâ materiâ ultrò citròque pervolitante, significans; multumque differt ab ulcerosâ Lassitudine & Rigore, licet persæpè confocientur; nec etiam parum à Causo, quamvis materiâ affinis: lubricus tamen est illius in Arthritidem transitus, cujus veluti prodromus jure perhibetur; infirmos naturâ articulos frequentius invadit, diris tormentis affligit, quæ ut nocturnâ exacerbatione, ita etiam contumaciâ, venereos cruciatus æmulantur.

## I V.

**L**ICET serosa illuvies morbis levioribus ac vix duraturis doloribus locum faciat, eò tamen contumacior morbus est Rheumatismus, quò mobilior illius materies omnis sedis impatiens, coctionis ornamentum recusans, ægrè

(\*) Non astipulamur auctori nostro deducenti Rheumatismi originem ab uno viscerum fervere, maxime hepatis; in occultis rerum nempe conjectura omnis vana. Annuimus verò Rheumatismum habentem effluvium feri acris, per varios telæ cellulosæ mæandros longè latèque luxuriantis, membranosum genus acuto dolore crucians atque exercens.



ac ne vix quidem convenientibus ipsis præfidiis morem gerit, & nisi sedulâ gnavâque solertiâ illi prospiciatur, dirum morbi genus evadit. Tantæ ergo dolorum acerbitati ut medeatur, prius æstuantibus visceribus contemperandis consulendum, quàm de leniendis & demulcendis Rheumatismi doloribus acerrimis cogitandum: Calidis itaque medicamentis imprimis parce; jusculem potius frequens sit usus, & ptisanæ ex hordeo & radicibus cichorii & nenupharis paratæ larga potio; alvus sollicitetur sæpius enematis refrigerantibus & emollientibus; nec parùm proderunt emulsiones ex seminibus frigidis majoribus contusis, sed præ cæteris opitulandum erit venæ sectione multoties ex partibus superioribus & inferioribus, non trepidè ac cunctanter celebrandâ, tanquam tutissimâ inflammationum anchorâ, seu foris seu intus sæviant (quicquid clâmitet Empiricorum & Medicastrorum quorundam ignorantia); hæc impurus imò corruptus in Rheumatismo sanguis, quâ data porta, detrahitur; & quamvis humor iste efferus, volubilis & tenuis ad sui excretionem te invitet, absit ne ementito orgasmæ deceptus, de catharsi mediteris; nec enim in Rheumatismo turget materia, summumque in festinatione periculum est, sicut in morâ securitas: satiusque erit tardè ac lentè ferocem & malignum istum humorem coercere ac evacuare blandioribus ac mitioribus medicamentis, ut multâ cassâ & paucis foliis orientalibus, quàm valentioribus pharmacis exagitare quibus ægrescit: fuge ergo diacrydiatorum genus omne, doloribus Rheumaticis venenum infensum, ut electuarium diacnicum, de citro, de succo rosarum: apage pilulas, colocynthida, syrupum de rhamno, omniaque diuretica & hydrotica medicamenta; quibus licet serosa educantur, nimiooperè exasperatur humor supra modum ferociens: miseri quidem & infelices quibus per aliquod tempus dolores dederint inducias, provocatis sudoribus, his quippè quò fuerint copiosiores, eò viscera magis exæstuant, & dolores paulò post majori cum detrimento recurrunt; hydroticorum vi atque ardore concitatus sanguis ebullit magis & effervescit, tenuiorque ac subtilior factus, novisque stimulis agitatus, omnes corporis partes penitus subit atque permeat, novos denuò & atrociores dolores excitaturus.

## V.

**SUDORIFICA**, quorum immensus penè numerus, sive domestica, sive Sextotica, insigni calore & eximiâ quâ pollent partium tenuitate, colliquandi potius quàm sudoris provocandi vim obtinere ita constat, ut eorum largo potu corpus attenuatum exarescat potius, totumque macie conficiatur, quàm copioso sudore diffuatur. Sudores ut & lacrymas fieri eliquato sanguine quis ignorat? nec è solo corporis habitu, sed & interdum è præcordiis moveri, in quibus fons eorum præcipuus: qui si vi morbi, balneis, aut labotibus, aliisque similibus de causis fiant & excitentur, nequaquam juvant: hinc qui Thermarum usu eliciuntur sudores, plus afferunt detrimenti quàm emolumenti. Qui & obfirmatis & recentibus Rheumaticis conflantur doloribus, si fortè Borbonienses Archimballicos fontes adierint, belli quandoque redeunt, ut æstum ferant levius & habitiores fiant; dolores postea reviviscunt acerbiores & atrocius feriunt, quàm antea, excitatis tamen à liberali istarum aquarum potu sudatiunculis, relicto scilicet fomite, nec emendatâ viscerum intemperie; hæc siquidem ut jusculem parandis, sic fervidis visceribus contemperandis omnino sunt ineptæ, licet obstructa referent & meatus aperiant; & Impluvium, seu ab istis aquis ex alto cadentibus partis dolentis irrigatio, leve & momentaneum aliquod laborantibus solatium afferat, partem afflictam roborando. Sudorifica ejusdem ferè naturæ cum



4  
 istis aquis, aut etiam calidiora, mitigandis atque edomandis Rheumaticis doloribus minimè profunt, quæ humores in habitu corporis, sive membranarum sive musculis impactos discutiendo, intemperiem jecinoris præservidam, præcipuum Rheumatismi auctorem, alunt & adaugent: hinc à frequenti eorum usu exhausta ferè omnium corporis partium aquosa humiditate, retorrida fiunt viscera & exarescunt, sanguis incandescit, bilis stimulus magis atque magis acuitur; & resoluta tenuiori humoris qui in habitu corporis delitescit portione, crassiore in tubulis venarum & præcordiis relicta, veluti fomite brevi redituri morbi, dolores de novo excitantur non momentanei & errabundi, sed fixi & permanentes, fugacibus & succedaneis tantò sæviores, quantò incuneata materia mobili minus est morigera.

*Non ergò Rheumatismo Sudorifica. (\*)*

(\*) Fas sit tamen nobis Granum salis hinc apponere; quippè si astuoso morbi tempore, prudenter amoveatur fervidum omne undè sudorifica educi solent: Quæ diaphoretica dicuntur, astu sublato naturæque ultrò vergente ad diaphoresim, cum bonis ægri rebus usurpari possunt, teste quidem quotidianâ artis Antistitum experientiâ.

## DOMINI DOCTORES DISPUTATURI.

M. Eduardus-Franciscus-Maria BOSQUILLON, Eques, è Societate Medicâ Edimbur- genfi, Professor & Censor Regius.	M. Joannes-Jacobus PAULET,	M. Joann.-Steph. GUETTARD, Regiarum Academiarum Pa- risiensis, Rupellensis, Flo- rentinæ & Stockolmiensis So- cius, Censor Regius, & His- toricæ Naturalis Musæi Sere- nissimi Ducis Aurelianensium Custos.
M. Ludovicus-Carolus-Henri- cus MACQUART.	M. Tuffanus-Ludovicus GUIN- DANT, è Regiâ Scientia- rum Academiâ Monspeliensi.	M. Natalis - Maria DE GE- VIGLAND, Regiorum in Ger- maniâ Ducum, & Militum No- biliores antiquus Medicus.
M. Joannes-Franciscus-Jacobus ROUSSILLE DE CHAM- SERV.	M. Claudius-Anton. CAILLE, è Societate Medicâ Edim- burgenfi.	M. Petrus DE LALOUETTE, Regii Ordinis Eques.

Proponebat Parisiis JOANNES-JACOBUS-HIERONIMUS DUCOS, Nogarensis, Doctor Medicus Remensis, necnon Saluberrimæ Facultatis Medicinæ Parisiensis Baccalaureus. R. A. S. H. 1783.

AB OCTAVA AD MERIDIEM.



Typis QUILLAT, Universitatis & Facultatis Medicinæ Typographi. 1783.